



天津交通銀行同人俱樂部圖書室

00

左文襄公批札卷五

起同治十二年癸酉訖十三年甲戌

目錄

甯夏府李守藻稟復所屬暫緩考試情形由

岷州呂牧恕稟請頒發書籍由

沈鎮玉遂稟叛逆偷竄米拉溝情形由

統領老湘全軍劉京卿稟陣亡員弁血戰捐軀應乞奏懇

優卹由

龍道錫慶稟辦理西甯善後大概情形由

劉京卿稟收復大通縣城擒斬逆酋匪黨由

劉京卿稟陳西甯勦撫事宜及籌辦糧運由

批札卷五目錄

劉京卿稟馬桂源率黨千餘盤踞堂崙頭地方由

河州潘牧效蘇稟請准令回民遷歸本籍由

楊參將世俊稟進駐威遠堡堵截竄路由

平番王令炳猷詳呈俄卜嶺難民戶口清冊由

魏道光燾稟奉文安插回目禹得彥等由

狄道州喻牧光容稟撫回馬榮請歸故土情節由

鎮原縣左令壽棠稟民人高興曇等捆送勇丁方成傑王紅

良訊取供詞請示由

邠州喻牧兆奎詳勇丁朱曉文等威逼民人王蠻子身死一

案由



甘州府余守士穀稟報到任日期及地方情形由

西甯郭道襄之稟訊明徐勝福甘心從逆請示嚴辦由

楊參將世俊稟追剿白逆獲勝情形由

清水縣高令蔚霞稟張家川一帶不能安插崔偉一股情形由

楊參將世俊稟會剿外援大獲勝仗由

宋提督慶稟全軍抵涼日期及布署一切情形由

徐提督占彪稟派隊踏平賊巢截剿援賊大獲勝仗由

秦安縣程令履豐稟續到西甯撫回實在無處安插情形由

雷提督正綰稟請入營及下馬關營可否照紅德城營之例

批札卷五目錄

二

募兵差遣由

秦安縣程令履豐稟安插撫回悉在屬境并無推諉情形由

肅州續收增稟各軍在毛目追剿白逆打仗情形由

文縣陶令模稟捐設卹糈經費規條由

平番縣監生王好賢稟控鄭守和等一案由

會甯縣許令茂光稟指撥荒絕地畝籌辦養濟孤貧及義學

田畝由

宋提督慶稟擊退撲營逆賊各情由

河南候補副將馬策勳稟奉文遣丁來甘搬取眷口由

平番縣紳耆柳正顯等呈稱黑龍江馬隊調駐紅城并未擾

民情形由

劉京卿稟米拉各溝漢多於回請遷徙土客各回由
徐提督占彪稟用礮轟城情形由

崇藩司保詳甘提屬莖生馬匹被搶罄盡司中無案可稽由
金縣李令緒稟匪徒伏匿茨兒溝等處地方由

張掖劉令榮亮稟土豪阻抗軍糧懇請嚴辦由
蘭州府鐵守珊稟賀捷喜并開設難民局務由

陝藩司詳送武舉張書紳等請補路塘冊結由
肅州李牧宗笏稟辦理保甲屯墾并購買耕牛開挖煤廠各
情由

批札卷五目錄

三

崇藩司保等詳查前署徽縣楊國光營私一案由

肅州李牧宗笏稟見辦善後屯墾事宜由

畱壩廳趙丞履祥稟安插撫回及遣勇練兵事宜由

肅州李牧宗笏稟州屬邊關五方雜處往來游勇溷迹請嚴
密巡緝由

皋蘭馬家灣回民馬天雲等呈稱無地安居懇請仍回原籍
由

山西蔣藩司凝學稟候由

河州潘牧效蘇稟回民古祥泰等私遷靜甯由

平番縣陳令觀幹稟安插回民與漢民處處爲鄰究應如何

辦理請示由

陝安三道壽稟白河會匪滋事情形由

李鎮正魯稟自岔口驛至鎮羌驛路途寫遠難免游匪隱匿
擾害良善由

狄道州喻牧光容稟回民馬榮所築圍牆情形由

陝安三道壽稟遵札提訊陝安魏鎮稟揭周國瑞等一案由
中衛縣邵令杜稟點驗石空等堡防兵家屬請撥地耕墾由
陝西譚藩司鍾麟稟商調撥營頭由

肅州李牧宗笏稟肅州新復民勇雜處懇請巡緝安撫由

李提督輝武稟請加餉添兵由

批札卷五目錄

四

劉京卿稟黃令各情由

狄道州喻牧光容稟籌款興修學宮由

周提督紹濂請借領大餉籌議楚湘各軍建醮由

陝西軍需局詳報湘果軍各營卹賞及墊發各款准駁一案
由

肅州李牧宗笏稟請修嘉峪關邊牆以便稽查稅務由

李提督輝武稟移紮乾防情形由

沈鎮玉遂稟出隊剿捕河州叛匪由

張鎮福齊稟自率營務營渡河駐防汪百戶由

河州潘牧效蘇稟閔逆直犯西南兩關燒燬房屋由

沈鎮玉遂稟賊擾關廂縱火燒搶由

粟鎮龍山稟會商各軍駐防情形由

張提督仲春稟會商各軍整隊合剿并籌備防地由

劉提督端冕稟布置後路防務由

劉京卿稟親率各營進駐大何家由

劉提督端冕稟率所部馳赴康家巖并派營接防由

狄道州喻牧光容稟城防喫緊募勇一旂請發薪糧由

張提督仲春等稟在甯河擊賊情形由

署哈密協魏副將忠義稟哈密情形由

尤鎮成章稟洮防喫緊情形由

批札卷五日錄

五

劉京卿等稟會合沈鎮進攻各情由

狄道州喻牧光容稟蕭提督調隊布置情形由

劉京卿等稟連日會剿閃逆情形由

張鎮福齊稟前往甯河將剿辦情形稟商總統由

粟鎮龍山稟親率中營駐防八峽口由

狄道州喻牧光容稟募勇破糧情形由

劉提督端冕等稟在胭脂溝等處擊賊奪獲軍械輜重由

張鎮福齊稟辦理大東鄉從賊餘逆并搜獲軍械由

陝西裕臬司寬詳嚴訊潘溢中供詞由

甯夏府李守藻稟復所屬暫緩考試情形由

同治癸酉

甘省停考十一年之久各屬士子無不志切觀光又值選拔之年一經遲逾須待下屆其糜爛地方如平慶涇等屬尙且設法辦理該府所屬雖經匪擾斷不如平慶涇之甚乃疊奉學院函札一味宕延及奉本爵大臣嚴飭尙復率請延緩并將士子足數之中衛縣亦併請推展不知其意何居至學院體恤異常經費一切概不講求卽如西甯甯甫經解圍學院尙意在按臨開考免阻寒峻向上之心該府曲徇劣屬所請置

大典於不問荒謬已極本應撤參姑寬批飭仰卽督率所屬印學招集士子迅籌考試俟學院將甘涼西甯試竣卽行按臨儻再支展貽誤定卽從嚴參撤決不寬貸

批札卷五

岷州呂牧恕稟請頒發書籍由

六經傳註讀者少而刻者亦少此次影刊鮑氏善本卽前在浙所刊舊式而又重加復校者也當爲海內孤本以視浙刻尤精但願邊方髦俊熟讀深思庶延關學一綫老夫亦不枉此一行也隴西人民質直近古三代以還自西徂東王者迹熄孔孟轍迹并不到秦老子入胡且化爲佛秦漢以後更無論也自有天地以來此方不霑聖人教澤是書刊布其曷可緩來稟乃稱關重文學千載免亥豕之訛何所見之陋乎晚近讀書不知講明義理藏之心而體之身但以之習章句博科名以求世俗所爲富貴利達而已此心

何可令古昔聖賢見乎該牧亦豈不自命爲學而仕者在岷數年飽經患難試捫心自問其有益民生有裨世教者何事其不爲習俗所移者何事姑勿論其心之所存者爲何如也茲如所請發新刻六經全部交來使祇領返岷可細心誦繹以補幼學疏略免忝儒冠是該牧之至幸亦本爵大臣部堂所望耳

沈鎮玉遂稟叛逆偷竄米拉溝情形由

據稟叛員馬桂源等喉各回逆千餘偷出米拉溝意圖東竄經軍功馬占龍馬永瑞帶左右各旂前往截擊斬獲多名賊敗歸巢所辦甚好此次勦賊出力之馬良義等裹創血戰實堪嘉尙應由該鎮察核開單稟知給與獎敘馬悟真先將冰橋擊斷杜賊紛竄復協擒要犯高復箇甚屬奮勉應給獎敘以示鼓勵亡傷勇丁均照章給予恤賞銀兩可也

批札卷五

二

統領老湘全軍劉京卿稟陣亡員弁血戰捐軀應乞奏懇 優卹
由

來牘欣悉上臘二十六日及新正初一日勦賊獲勝并初四日攻克向陽堡生擒叛弁馬壽及逆目馬進祿韓起壽等共計斬馘千數百名足寒賊膽此次崔偉等亦頗出力辦理均協機宜深堪嘉慰候卽據實入告所有陣亡員弁并候奏請

卹典其大通營永安一帶亟應迅速移營進剿以竟全功昨已調楊參將世俊所部奇捷四營回駐通巴但不知能否速到至巴燕

戎格一帶已檄河州之師進剿并飭劉提督放鎮分撥各營嚴扼出竄之路均經隨時咨明貴京卿矣

龍道錫慶稟辦理西甯善後大概情形由

所陳辦理善後事宜在他處爲名言在甘省則陳言耳如果實心實力爲之爲其事必有其功將拭目觀之見在以賑墾爲第一義賑者以乞匄養之不可久也墾則無窮利賴實地方長久計勸相不可懈督責亦不可少緣甘肅民人愚而惰惟知望澤希恩不知自食其力也民間築堡可給以糧庶事易集籽種農器必須預爲籌辦免致失時此應亟爲留意者

劉京卿稟收復大通縣城擒斬逆酋匪黨由

批札卷五

三

向陽堡之捷已據實馳奏矣茲准牘開收復大通縣城擒斬逆酋匪黨三百餘人軍威更振所辦均協機宜欣幸奚似回性多疑善詐其就撫誠僞不必輕信亦不必輕啟其疑惟須隨時相機應之十九日由郭蟒威遠回西甯先其所急尤見機神妙速佩慰之至惟所帶隊伍似尙單薄崔偉之赴水碓所部亦單恐未足扼其竄路切希留意察看賊情求撫決是假意乃欲緩我追剿以便覓路逃生耳其竄路必由青海該處貝子札薩克恐不足恃能設法預圖之否希迅速籌畫爲要治復興投誠旣是真心此次被戕深爲憫惻俟照前署官階籲請

卹典

劉京卿稟陳西甯勦撫事宜及籌辦糧運由

所論辦法自屬至當撫局以呈繳馬械爲入手先著其眞僞卽從此可分此時言客土各回必欲併力抗拒去生就死亦必無此情理然徘徊觀望者有之其欲姑爲嘗試者亦在所不免非擇其頑固不化者痛與勦洗恐良者不見德而莠者亦生心也馬正國等各股不過千計如果頑梗不服阻撓撫局當卽鉏之亦顧不得許多也至以毒攻毒之說則恐用不著矣馬長順有一子爲宋軍門所獲如此逆能傾誠就撫當設法寬以還之馬桂源弟兄逃踞巴燕戎格馬德源被殺河回頭目馬永瑞等惡之見正與其拒絕蓋與良回馬永福本近支弟兄同拱拜也五工撒拉不過暫時附和

批札卷五

四

其餘各工尙與馬占鼇馬永瑞同心力拒也所論檻中之獸逞暴亦無幾時自是確論畱爲後著尙非不可糧事如恃涼州爲來源未免勞費過重且馱腳亦難覓雇不如仍在附近地打算所請籌解二萬兩俟餉到卽發敬承綸候卽撤調來省查辦黃令仁治卽委署大通另札行知大通加設副將平戎改駐千總應歸善後案辦理暫可毋庸議及

劉京卿稟馬桂源率黨千餘盤踞堂崙頭地方由

來贖具悉叛首馬桂源本源因河州官軍進勦巴燕戎格洵懼求撫劉提督在虬思觀似無他慮惟該叛等已於二十六日返竄巴燕戎格復於二十八日赴虬思觀乞撫如果河州官軍緊逼該叛

等何能往來自如且劉提督函開該叛請於二月初一日迎大兵入城大約所指之城卽巴燕戎格城豈河州官軍已到尙容其另赴別軍求撫耶抑該叛等希圖以業經求撫騙河軍耶是皆不能無疑也白彥虎等之圖竄關外自在意中此次竟任兔脫終貽後患貴京卿雖檄青海左右翼兩盟長嚴加防堵未知能否遮截恐又鬧壞一路并擾及海藏更不好也至諸撫回安插平涼清水秦安各處應各縣妥爲安插卽沿途經過各地方亦應妥爲照料自不待言已一面分別行知預備惟崔三求安插之弓門寨可准馬鹿坡則不能准以其地連隴州也其餘如平涼之十二堡崔子街尙須飭查是否可以安插并有無土著漢人大約安插回民地址必須另成片段而又不當衝要乃爲合式俟各回目叩見時當面諭之此稟初六日始到省此批到西甯時計又須六七日則該撫回等已遷徙載途貴京卿可不議及矣

河州潘牧效蘇稟請准令回民遷歸本籍由

回民自成氣類與漢民仇隙素深從前陝回避勦以甘肅爲退步甘回又以金積堡河湟爲歸宿撫局定章除金積新教勒限遷徙此外准河湟本地回民就近安插餘皆概令遷徙不准安插故土蓋當時兩省各屬回民業已從亂如歸與其鄉鄰尋仇構釁漢民被其戕害戮辱慘目傷心此時若准其仍歸舊業漢民目覩舊仇復至必不甘心因而糾聚報復滋生事端官司防禁難周勢所必

至故定章撫回必須遷徙安插而又必於異地荒絕各產另成片段者安置方期周妥來稟皋蘭城外及各州縣客回概請遷歸本籍但圖目前易於遷徙官司可省心力客回獲歸故土不知後患更長卽各回民亦終無安居樂業之一日也所請不准凡由河州遷出各處回應卽先行飛稟聽候行知諭定安插地方預爲籌備斷不准任意率行只圖推卸了事致違定章自干咎戾懍之

楊參將世俊稟進駐威遠堡堵截竄路由

大通縣及向陽堡一帶逆回均經劉京卿剿辦克獲大捷斬馘甚多并畱數營駐縣鎮壓見在西甯各股陝回概已就撫惟白彥虎一起及馮均祿馬正清馬長順等覓路北竄二月初四日已據大通縣稟報竄至永安之南其迹似向扁都口一路人馬無多除紛紛奔回外隨竄黨夥又多凍餓致斃計過扁都口亦不能戰矣仰卽勤發確探迅速截剿毋任一名漏網是爲至要

平番王令炳猷詳呈俄卜嶺難民戶口清冊由

該縣東鄉俄卜嶺等處難民大小丁口二千三百餘名或全數流寓大靖或有新歸原堡者未據分晰聲敘其流寓大靖難民或就地墾荒或招回故土給種耕作此地方官早應清查安撫之事俄卜嶺難民去冬具呈到轅本爵大臣部堂札行該縣查復久已奉文遲之三月始行詳復該難民等應如何安撫全無一字敘及該令全不以民事爲重殊堪痛恨此時春耕在卽緩則失時該難民

是否歸業或係極貧必須由官散給種籽仰徑移平番採運局籌發一面具報毋再疲玩干咎

魏道光燾稟奉文安插回目禹得彥等由

西甯頭起兩批遷出回民見分起解送平涼安插通計不過七千二百餘名口內除應撥入化平廳安插各戶口外其安插平涼縣境約不過六千餘名口除大小蘆河外華亭之策底鎮十堡子兩處及此外荒絕地畝均可分散安插惟不宜與漢民雜處所撥地畝宜按戶口分撥不宜偏枯宜稍從寬裕不宜刻覈未定地畝之先行糧宜照給安插定妥宜預籌籽種農具賑糧督令安心耕墾免誤農時仍繪圖貼說呈齋并繳還札發原冊備案以憑核對仰即遵照悉心經理勿稍延誤干咎

批札卷五

七

狄道州喻牧光容稟撫回馬榮請歸故土情節由

安插客籍回民無准其仍歸原籍之理定章如此況馬榮舊住之牟佛諦已早飭平毀此時尤不能任其復歸舊業致啟衅端馬榮一起既由前州牧批准暫借葑臺耕居并未求歸牟佛諦亦自知牟佛諦之不能安居此次具稟陳臬司朦請歸籍祀奉先靈亦未敢明指牟佛諦爲言是該回民亦明知故土之不可復居也所請仍歸牟佛諦一說斷不准行仰即擇荒絕地畝另成片段者妥爲安插其地屬各州縣者准由該署牧稟知以憑札飭遵行至該回民在葑臺已經播種姑准俟秋收後遷移其原籍祖墳准其自行

扞踈丈尺釘立界石由該署牧出示禁止侵佔平毀具結備案可也

鎮原縣左令壽棠稟民人高興曇等捆送勇丁方成傑王紅良訊取供詞請示由

方成傑王紅良二犯據民人董迎邦等供係半夜索食復因索錢未遂放火行搶等情查該犯等既圖搶劫斷無點燒門外草堆始入院喊殺之理是索食是真索路費尙無確證放火一事必係該民人自行點燒爲號召鄉鄰前來救護之計若據原呈就地正法不足持情法之平惟該二犯本係營勇告假旋復來甘因投營未收復敢出外肆擾夜入人家索食其斷非善類可知當此查拏游勇之時若不從嚴懲辦無以昭儆戒而靖閭閻仰卽監提該犯重責三千牢固羈押俟關內肅清再行稟候押解遞籍管束可也

批札卷五

八

邠州喻牧兆奎詳勇丁朱曉文等威逼民人王蠻子身死一案由犯勇朱曉文卽朱學文威逼民人王蠻子吞食煙膏毒發身死業經屍親鄉約鄰右供指相符該署牧親驗無異自應拘傳犯勇訊明詳辦以昭核實朱曉文既查係統帶親兵劉提督所部勇丁并非無著落可知何以該署牧關傳時該統帶竟以早經革退一語回復并不協緝文案該署牧并不向索犯勇僅以懸賞勒緝移會鄰封協緝請咨湖北原籍查拏具詳銷弭完事殊堪詫異之至無論該犯勇早經革退與否係該營諉卸之詞不足憑信卽眞係早

經革退而該犯勇隨同該營駐紮州城佔住民房兩月餘之久該營豈得諉爲不知何以聽其逗留滋事迨釀命後始以早革推卸豈人命重件可不由地方官審辦耶軍民雜處最易滋生事端尋常細故地方官從中設法調處情理所有無足深論至釀成命案則不能不秉公核實以持情法之平若以該犯本係營勇一加深究慮於營官情面有礙故意含糊是重私情而輕民命視

國法如弁髦地方官咎將誰諉仰陝西布按兩司轉飭該署牧查明統帶親兵營劉提督係何名是何軍統帶一面嚴緝犯勇一面錄批移知劉提督速將該犯勇緝拏務獲交該州訊辦具報毋任違延干咎切切

批札卷五

九

甘州府余守士毅稟報到任日期及地方情形由

據報到任日期已悉甘郡事本可爲果能正己率屬實心經理何事不辦空說休養生息終是無濟惟遇事存著視民如傷念頭於政煩賦重時力求撙節愛養行之無倦持之以恆其庶乎見當用兵時文報最關緊要處分綦嚴必應督飭有驛各屬妥爲經理按限馳遞是爲至要白逆等竄至毛目前月二十二日楊參將馳扼金塔聞徐提督已飭桂副將等先向金塔進剿如痛剿數仗將兇惡殲擒庶免闖出關外來稟於此事尙未確探仰將毛目金塔戰狀隨時偵明馳稟

西甯郭道襄之稟訊明徐勝福甘心從逆請示嚴辦由

徐勝福卽徐尢麻兒身當制兵竟敢投入陝回甘心從逆獻計開礮攻破白土莊班沙爾各堡戕害男婦萬餘罪大惡極事平之後猶敢毆傷債主行兇逞強全無忌憚若從輕斬決猶屬罪重法輕無以雪冤忿而伸

國法仰卽會同署遊擊監提該犯徐勝福卽徐尢麻兒答責三千綁赴市曹凌遲處死永遠梟示以昭炯戒

楊參將世俊稟追剿白逆獲勝情形由

白逆等股眾能戰者實不過二三千老弱眷屬及大通隨同竄走者或多或少不知確數該參將事前不能速趕大通會剿又不能力扼扁都要隘致賊竄逸迨尾後追賊節節遲延惟僥倖他軍獲捷得以分功卸過而已此次陶提督桂副將廿三日在毛目接仗殺賊頗多該參將廿二日已報行抵金塔并無戰事至廿五日桂副將等追賊北行該參將始報廿七廿八之仗尙云屢次獲捷未有如此痛快者意將誰欺仰卽拌命窮追以贖前罪儻仍畏葸觀望決不寬饒

清水縣高令蔚霞稟張家川一帶不能安插崔偉一股情形由

候飭秦安縣查明稟復安插回民定章原係擇荒絕地畝無漢民雜居之地且應由地方官指定安插無由該護送委員及回馬隊擅行爭佔之理此起回民安插伊始卽不聽地方官指撥地畝靜候處置殊屬刁健弊由劉京卿將就太過懸揣各屬荒絕地畝曲

徇所請勉允安插而所派之員如陳啟明又糊塗不曉事體致從中挑衅生端惟知有意見好撫回不遵定章不顧大局本爵大臣於陳啟明前次稟請稍緩回銷日期到營已飭其迅速回蘭矣仰卽錄批催促毋任逗留其馬殿林所帶回馬隊卽責成陳啟明刻日押回蘭毋任藉延滋事已咨知劉京卿矣秦安程令向稱明練何以此次一意推卻不顧大局已嚴飭於該縣境酌量擇地安插不准誘卸

楊參將世俊稟會勦外援大獲勝仗由

此次內剿城逆外擊援逆尙爲出力仰卽督飭弁勇奮力猛打務將各賊殲除迅克州城共膺獎敘白逆等旣將眷口搬踞塔爾灣一時互相牽綴必難遽遁官軍後路穩固兩捷之後士氣彌壯可冀得手憑長濠截勦城逆尙易爲功惟須防其黃夜偷竄白逆一股斷不宜縱令西竄接仗以多殺悍賊爲功不可貪其輜重至其婦女老弱則聽自填溝壑可耳已於徐提督稟批示矣該參將旣抵肅州一切應聽徐提督節制調遣不准違誤

宋提督慶稟全軍抵涼日期及布署一切情形由

來牘祇悉白彥虎等逆由扁都口竄撫彝高臺因畏官軍夾擊遂渡黑河竄高臺屬之毛目蜀軍統領徐提督遣陶桂諸營會合金將軍成提督所部於前月二十三日由金塔擊之二十五日賊向金塔附近北竄楊參將截之均獲勝仗賊繞道北竄意在徑越關

外因肅州踞逆遣其黨馬鎮國史其救援肅州并啖以重利白逆乃率黨援肅三月初三日竄至肅城西北四十里之野麻灣時徐提督各營均調回肅州楊參將亦回肅助剿白逆時由野麻灣竄踞肅城西南三十里之塔爾灣與城中賊約彼此互通聲息初七初九兩日官軍內防城賊外剿援賊均獲勝仗擒斬頗多昨日得徐提督稟報大概情形如此據見在局勢言之肅城長圍已合濠工已成城賊竄路已斷官軍各營憑濠堵截自易爲功只須防首逆夜間偷過其塔爾灣本係肅逆老巢上年經徐提督攻破後久已無賊白彥虎盤踞此處并安頓家眷無處擄掠糧食何能久踞此賊兇狡必不坐以待斃或由嘉峪關西竄或仍由北路繞竄關

批札卷五

三

外亦未可知官軍如能予以痛剿或乘其竄動極力猛追了此一患實爲至幸援賊若盡城賊自在掌握中矣但本月初十二日以後尙未接到續報未卜何如耳至金將軍調嵩武赴肅助剿尙係前月下旬之事已接其咨文昨又奉到

寄諭知朗齋軍門亦奉赴肅助剿之

命計整軍西行到肅尙須時日也貴部蔣提戎已向甘州進發如探知肅軍確實情形援賊尙未竄動則由甘赴肅助剿極爲妙著惟糧運兩事必須預爲籌度以此時採糧辦運均忙在一時採糧既有成數宜將金軍馱腳湊齊儘運乃免懸軍以待緣西路用兵非如此不可也如援賊敗遁則事勢從容遲速均無不可希卓裁

酌奪

徐提督占彪稟派隊踏平賊巢截勦援賊大獲勝仗由

初九十二等日踏破賊巢擊敗城賊連獲大捷旋據楊參將世俊稟十六夜之戰斃出城白巾悍賊尙多殊深欣慰惟餘賊竄出嘉峪關終畱後患據稱除擒斬外收回裹脅難民數百賊目大司務當卽大通之二司務業經勦敗是出關人數無多仰卽乘此援賊遁逸城賊孤蹙之時督飭各營力拔肅城以膺

懋賞攻城惟後膛螺絲大礮最爲得力前派鄧副將增帶解原來礮子四百前來計此時已早到矣鄧副將測放較爲有準曾屢著成效肅城雖堅厚異常亦可攻破惟入城之際必須派定隊伍嚴

批札卷五

三

守城門外濠力遏衝逸不准違令擅入致有貽誤事平一體論功分賞其入城弁丁不准私取賊巢財物搶奪婦女大干軍令仰卽錄批出示可也

秦安縣程令履豐稟續到西甯撫回實在無處安插情形由

查安插該縣撫回畢大才等戶口未由西甯起行之先接准劉京卿牘報約有萬人當飭該縣預擇安插地址嗣據稟復龍山鎮附近荒絕各產居多而地址又各成片段以之安插甚屬相宜當經本爵大臣批准照辦并飭分撥地畝宜按戶口稍從寬裕方可爲久遠之計此次劉京卿續解陝回畢大才崔偉各股內零星戶口到轅點驗畢大才股內共計二百八十名口飭解該縣安插又崔

偉股內共計四百七十七名口飭於秦安清水兩縣交界地方擇荒絕地畝安插於三月二十八日分飭遵照在案茲據來稟此起回民准前縣傳知應赴秦安安插者千二百口該縣境內無處安插等情查前據稟復擇龍山鎮附近地址約可安插萬人見在該縣安插畢大才等戶口僅三千餘人此次解來西甯續遷眷口共不過七百餘名撥赴該縣安插者僅二百八十名餘均派赴該縣與清水交界地方安插茲稟忽稱縣境并無安插處所顯係有意推諉且此起續遷眷口均係前起尾股業經派定安插縣分起解何能另擇他境致涉紛歧仰俟此起撫回解到立遵前札擇地安插具報毋許故違切切

批札卷五

四

雷提督正縮稟請入營及下馬關營可否照紅德城營之例募兵差遣由

來牘敬悉入營下馬關係商販往來衝要固不可無兵防護惟從前甘省各營汛設兵雖多究不如此時防勇之星羅碁布增兵則必裁勇庶兵制漸復糧餉無待另籌勇編爲兵不致散爲游蕩入營下馬關援照紅德城營之例各添守兵四十名或卽於貴部中挑散勇十長之得力者編入缺額卽不另補似於裁勇添兵不無裨益卽希貴軍門酌奪見復同心城亦應增兵候行甯夏鎮查復核奪

秦安縣程令履豐稟安插撫回悉在屬境并無推諉情形由

據稱該縣撫回安插大小楊家川其地毗連清水松樹鎮該鎮民人聯名捏稟高令不察遽爾上瀆此亦該令懸揣之詞查高令三月十六日據松樹鎮民人稟報秦安採擇該鎮安插回民原有未接秦安移文候移明查復一批其移文自必於是日發遞該縣迨十七日松樹鎮民人又聯名具稟稱已有回民家眷來鎮安插堡眾阻擋回民亦要強佔高令恐釀事端據情上稟尙無不合如回民無安插松樹鎮各情該鎮民人張根榮等捏控鄰封官長應由高令查辦但該令來稟亦不能保回民之不潛逃松樹鎮也亦應確切查明將如何安插地方形勢繪圖貼說編造戶口冊籍具報且該縣荒絕之地較多於清水安插回民原少於清水前據稟稱

批札卷五

五

龍山鎮近地約可安插萬人而初次所到該縣安插之畢大才一起僅三千餘人由西甯續遷之前起尾股人數無多該縣四月初三日來稟則云無安置處所非意存推諉而何該令辦公向稱切實此次或心存撫回之見欲以少安插者順愚民之私而見好百姓耳已批飭照前札辦理毋許故違至清水安插事宜高令不得專諉諸李德昌草率從事儻有貽誤定惟高令是問

肅州續牧增稟各軍在毛目追勦白逆打仗情形由

所稟均係局外浮言不盡確實如毛目殺賊無多歸咎事權不一試思毛目之役徐軍陶桂諸營及金軍派出之營及成營彼此勢分等夷將派何員統率別部營官又何能靜聽指揮三月初九之

役本得機得勢祇因馬隊諸營因貪取賊中輜重散隊分馳致有
損失幸徐提督步軍赶到始克保全所損尙屬無多若如來稟殺
賊五六百而官軍傷亡略等是桂馮兩營馬隊全數傷亡似亦無
此事也至肅城堅厚濠又深廣攻者難而守者易人所共知見發
螺絲後膛礮子講求揀選適用器具派委熟練之員隨帶前往原
所以省兵力而速戎機正盼捷書之至若定限攻拔之期則自古
無此兵法也至踞逆窘蹙至極或以就撫爲緩兵計此節亦曾慮
之早已函牘紛馳諒該牧亦有所聞

文縣陶令模稟捐設卹養經費規條由

文縣地僻俗陋禮教久衰該令畱心風化捐廉爲卹養經費并擬

批札卷五

六

規條以垂久遠具見深識治原迥異俗吏本爵大臣聞鞏秦階各
屬民間男女昏姻不循禮法相沿既久恬不知非如茲稟云云與
嶧山刻石文夫爲寄報何以異也若不示之以禮則廉恥道喪風
俗陵夷未有能免於禍亂者記曰壞國喪家亡人必先去其禮誠
哉是言候卽行司移道通飭各府廳州縣各就地方民俗深加體
察力求坊民正俗之道與邦人讀書明理者圖所以治之內外肅
清彝倫攸絃民興於行斯俗美於下今時切務未可視爲緩圖所
陳卹養規條并飭新署文縣劉令察照妥爲經理

平番縣監生王好賢稟控鄭守和等一案由

爾王好賢乃平番著名棍徒平日橫行武斷遇事生風本爵督部

堂已有所聞茲忽自稱書癡尤屬可笑爾既自命書癡則試以書諭爾周禮荒政弛山澤之禁平番屢經兵燹軍民樵采無出雹泉山樹木闊至五里自應弛禁以濟時需且雹災由陰氣凝結所成故其災每在四月純陽之後五月一陰復生而雹始作秋盡乃止其於百穀草木有損無益欲弭此患非除伏陰不可春秋傳論愆陽伏陰之理幽風詳鑿冰之政皆以銷其慝而資其用從未有密植美蔭以滋其毒者雹泉山林木之密足以凝寒召災未開伐以前無歲無雹患是蔭泉或可而蔭雹則斷非所宜此時開伐林木正足宣幽導鬱防患未形王好賢因圖據爲己利竟不顧地方之害莠言自口法何可容神廟蔭木何須五里之寬地方樵采何干

批札卷五

七

王好賢一人之事業經本爵督部堂飭拏發審尙敢藉口養親懇求曲貸耶仰甘臬司卽飭皋蘭縣迅速詳請斥革從嚴懲治以儆奸頑而除地方積害毋稍姑息至神廟前後左右應畱樹株若干候飭平番縣勘明具稟存案可也

會甯許令茂光稟指撥荒絕地畝籌辦養濟孤貧及義學田畝由所稟指撥荒絕地畝籌辦孤貧養濟及義學章程均悉所需耕畜十頭價銀約在二百餘兩該署令已捐廉六十兩爲之倡惟初復地方遺黎甫聚令其捐資採辦誠慮力有未逮已飭解耕馬三十頭交該縣領收轉發貧農計此時業已解到該署令儘可於此項耕馬內撥給毋庸另派民戶捐輸所撥賑濟孤貧及義學田畝仰

於撥就時繪具圖說通詳立案

宋提督慶稟擊退撲營逆賊各情由

來牘祇悉蔣提督十六夜擊敗撲營之賊十八日偏北門搶築一卡賊不敢出具仰威稜峻銳足令鼠賊膽寒殊深佩服貴軍門俟糧運稍有端倪卽擬親赴前敵公忠之誼遐邇同欽惟疊接前敵各軍營及安肅甘涼各地方官文報均稱軍糧不敷接濟轉運尤極艱難如前敵再議增竈則不免庚癸同呼貽誤大局金將軍全軍萬難開拔西行亦實因此本爵督部堂擬於日內將實在情形具奏請

旨金軍暫時未能開行貴軍門自無庸親赴前敵希仍駐甘郡就

批札卷五

六

糧再商進止其廣東張軍門全軍亦飛咨請其暫駐鎮番矣

河南候補副將馬策勳稟奉文遣丁來甘搬取眷口由

外省交涉民情應由民人赴縣具呈申詳請咨辦理如係職官遣丁作抱此定例也該副將眷屬被陷已久音問難通前次稟請行查尙無不合是以准理既查出後奉文搬取自應遵照定例赴原籍具呈或於服官省分就近遣抱呈請該地方官備文來甘認領均無不可但該將今之認領眷口非該將前署信陽協篆稟報公事可比何得率意越瀆秦隴回民向不知有地方官一惟阿訇之言是聽以致釀成巨案當倡亂之始并裹脅之眾不下數十萬人本爵大臣不忍玉石俱焚百計拯救得此殘黎擇地安插編給門

牌草除從前積弊以規久遠凡事皆由官斷毋許私行外出如另
有家可歸者仍准復圖生聚然必由地方官查明具文請示免滋
弊端該將忝係武職大員豈亦不知家私應由地方官管理輒卽
冒昧瀆請已屬非是乃更敢代馬振虎求查妻女且復附帶蘇占
傑呈詞一紙亦未查眷給領蘇占傑是否祥符監生其人是否安
分所呈情形有無虛冒何從查悉該副將種種謬妄實屬不曉事
體本應駁飭姑念婦女無依既經河南撫部院發給護票專丁前
來諒不致有冒領情弊准先飭知河州潘署牧將該副將眷口查
傳給領以免往返而示體恤俟該丁歸途過平涼時由平慶涇道
分別飭查馬振虎妻女二口蘇占泰眷屬五名傳訊明確如果情

批札卷五

九

願赴河南居住卽由該道加給護票填注名數交來丁張長春一
併帶回到河南後應將所領眷口名數呈明地方官具文報查以
憑備案而昭核實嗣後遇有此等事件毋再越瀆大于參辦切切
平番縣紳耆柳正顯等呈稱黑龍江馬隊調駐紅城并未擾民情
形由

鄉愚無知動輒來轅妄控前據爾等紅城堡民呈稱紅城駐紮馬
隊日需柴草無力供支又稱男女混雜不便當經批示不必過慮
茲復因常統領移駐城外修壘搭棚爾等又來轅遞呈懇免更移
前後互異合閱前後兩呈事由均無關緊要乃必如此瑣瀆徒煩
省覽何耶茲稟自稱紳士又不敘明生監及何項職員大屬有違

體制代書并不確詢更正尤屬糊塗若再似此謬率定予責革并飭原詞擲還

劉京卿稟米拉各溝漢多於回請遷徙土客各回由

前據馮道稟請將米拉溝漢民遷徙暖只溝當咨行貴京卿及陳臬司察酌復奪旋據陳臬司稟批漢民毋庸遷徙并咨貴京卿查照在案茲准貴京卿來牘米拉溝巴州溝漢多於回暖只溝全是漢民向無回產亂後被回民佔據漢民大半逃散見米拉各溝逃在碾伯之漢民懇求復歸原業如果屬實自應照准該處客回既多於土回并有陝回錯雜自不准任其穩踞他人業產惟米拉各溝應行遷出回民究有若干各溝內荒絕地畝另成片段之處究可安插若干應否派營前往彈壓仍希貴京卿就近妥籌見復以憑核奪

批札卷五

于

徐提督占彪稟用礮轟城情形由

大礮攻城歷有明效本爵大臣知之甚真見解過礮子千數百顆除用過外存畱之數至少約尙數百顆爲從來未有之事原以肅城堅厚非多費子不可耳鄧副將測放有準初一初二兩次轟攻已著成效若接連轟攻自當得手不必發令止之至城身轟卸亦從無徹底掀坍之事卽地雷轟塌城牆只分內八字形外八字形亦不能將掀坍之土陷入地下也當上城之際還是靠著將弁兵勇一氣爭心如果趁勢如潮湧進何事不成何城不克若心存觀

望又豈無可藉口哉逆賊此時惶恐已極必又卑詞乞撫妄冀緩
攻懈我軍心官軍亦必圖如金積辦法便宜了事惟恐賊情不似
金積容易墮賊奸計致失機宜也所有一切情形不能遙揣亦未
便遙制總之該提督任大責重肅城攻克遲速干係在該提督一
人不能有所諉謝如需本爵大臣前來督視軍情亦當親赴前敵
不敢畏卻也

崇藩司保詳甘提屬孳生馬匹被搶罄盡司中無案可稽由

甘肅兵燹已逾十載各營馬匹盡被搶失孳生之馬何出此時責
令各營賠還毋論事有不行且營制餉章尚未復舊亦復無從查
辦自應據實奏明豁免以期公允惟各廠被搶馬匹究有若干事
在何時疏失員弁係何銜名有無下落自應確切查明俾免舛錯
仰卽咨催甘肅提督軍門迅速查明詳請核辦

批札卷五

三

金縣李令緒稟匪徒伏匿茨兒溝等處地方由

據稟茨兒溝至立石頭紅峴坪一帶共計六十里山谷幽深人煙
荒絕近有匪徒伏匿以致劫殺之案層見疊出亟應搜捕淨絕以
通商旅候飭前路劉提督中路周提督各派妥員帶領馬步隊伍
裹糧進山彼此商同約期會哨遇有匪徒藏匿按名悉數擒解懲
處并飭該縣及安定會甯各選派熟悉地形路徑之民人差役前
赴該各軍爲其相導一面飭知駐軍靖遠張道派隊至一條城一
帶巡緝以杜竄越至所請分紮茨兒溝立石頭紅峴坪三處是否

扼要應飭周劉兩軍隊伍會哨事畢繪圖稟知聽候核奪

張掖劉令榮亮稟土豪阻抗軍糧懇請嚴辦由

土豪喬良廷卽喬鐸一名藐視官長簸弄鄉愚於採買軍糧要件竟敢任意阻撓造謠煽惑且平日動輒挾制官長欺詐鄉愚業經該農民呈控劣迹百端不法已極仰該縣提該土豪喬良廷立斃杖下以昭炯戒甘州民風近頗刁健恩不知感威不知懼均由姑息太過之故應一面錄批出示曉諭嗣後遇有奸民劣矜仍蹈前轍必予嚴懲以挽頽風而端士習斷不曲爲寬貸切切

蘭州府鐵守冊稟賀捷喜并開設難民局務由

肅城克復踞逆無一漏網見將漢民仍分別復業其免死之回民

批札卷五

三

分起安插可圖數百年之安解到蘭州之老弱婦女仰卽督同陶令分起點驗暫於北岸安置給賑候凱旋安插糧食柴火草束均宜妥爲料理俾延餘喘以廣

皇仁

陝藩司詳送武舉張書紳等請補路塘冊結由

查近年京省路各塘政缺皆因回逆滋擾道路梗塞是以就近由陝驗看給委此係一時權宜辦理豈得援以爲例前據該司詳送世職金耀鼎請補路塘冊結到院當經本衙大臣閣部堂批示見在道路疏通新揀堪充路塘之弁應由陝撫部院驗定後詳請給咨赴蘭驗看給委以符定制如示體恤或乘便差資遣赴蘭其投

文給委房費本衙門禁止需索在案迄今日久未據來蘭考驗茲據詳稱該世職金耀鼎業已褫革所遺塘缺以二等武舉張書紳充補仍就近由陝給委任事等情前來查陝甘軍務此時均已肅清道路疏通所有此次新揀堪充路塘之弁自應遵照前批照例送蘭聽候驗看給委任事以符定制勿得再行藉詞援案辦理總督重轄兩省文武軍民均應歸其管理而兵制尤其專責國家設官之意如此本爵大臣閣部堂不能俯徇各衙門書吏之請擅違定制也因此案聊示一隅仰卽知照

肅州李牧宗笏稟辦理保甲屯墾并購買耕牛開挖煤廠各情由據稟辦理保甲屯墾并購買耕牛開挖煤炭各情均悉所辦均是

批札卷五

三

肅城初復之地善後諸務宜悉心籌畫次第舉辦俾規久遠毋涉草率爲要辦理各情形仍隨時馳稟以聞所設屯墾保甲各分局俟辦有頭緒并歸善後一局以節糜費所擬甚是至併局時應仍由該署牧督辦毋須另行委員肅州城鄉查有游勇逗畱滋事應稟商譚提督飭派弁勇嚴密緝務獲訊究以靖地方所請遞解牌百張准隨批印發惟其中應查明見無職業流落彼處尙屬安分者准由該州酌給盤川遞解回籍其娶有家眷願在肅城落籍者准編入保甲給發門牌免其遞解仰卽遵辦

崇藩司保等詳查前署徽縣楊國光營私一案由

楊令國光前在署徽縣任內一意營私聲名狼籍業經本爵大臣

閣部堂札飭撤任查辦該司等會移鞏秦階道委查復核據情具詳尙無不合茲據董道查復據委員畱甘縣丞陳炳基稟復情形節節代楊署令設詞開脫微縣雲令亦代爲彌縫無非爲貪猾之令曲意保全起見殊出意料之外除雲令慶陳縣丞炳基先記大過陳炳基并永停差遣外鞏秦階董道向附清流到任稟復時亦力以實事求是自任乃到任以後隨俗波靡於應辦各事并無整頓實效此次委查楊令國光劣迹又漫不加察僅據委員一面之詞輒行移復不知是何意見甘肅官場惡習惟以徇庇彌縫見好屬吏爲事不復以

國事民事爲念馴致上下相蒙吏事廢弛若再事因循不知伊於

批札卷五

五

胡底興念及此實深歎恨惟鞏秦階董道已經徑札先記大過一次勒令實查楊署令劣迹具復如有一字含糊定惟該道是問肅州李牧宗笏稟見辦善後屯墾事宜由

所擬屯墾各條均悉新歸難民自應分別極貧次貧酌給賑糧仰卽就地採辦雜糧照大口八兩小口五兩章程按日勻放每月放賑若干分造花名領賑清冊備查經費除已發四千兩准加發銀八千兩以資寬裕仍應將動支細數分款開報不必挪動換錢借款致滋轉轉籽種就倉糧存款挪撥來歲秋後收繳亦屬可行惟倉糧動用支借細數亦應分晰造報并報藩司立案其餘清查地畝分別荒地絕產辦法杜冒佔等弊牛籽農具必由貧戶自行赴

局請領不假農約之手如果照來稟切實辦理肅州可望起色惟條議內有主之地經他人開墾原主歸來認業有契據爲憑仍准開荒人耕種三年然後退還原主此條欠妥原主有契據可憑之地已經人開墾或另撥給荒地抵交原主或當年糧草均由承墾人自收酌給原主十分之一次年始由原主自行耕穫較爲平允仰卽察酌情形妥辦爲要

畱壩廳趙丞履祥稟安插撫回及遣勇練兵事宜由

覽稟均悉從前回漢仇殺其曲不盡在回本爵大臣閣部堂督師度隴勦撫兼施苦心分明數年之間兇狡首要各逆概予殲除准撫各回繳齊馬械分別遷地安插如地方官撫馭得宜可百年無

批札卷五

五

事該丞所陳安插各回令與漢民聯親開葷食肉意在用夏變夷然獨不聞修其教不易其俗明其政不異其宜乎有天地以來卽有西戎有西戎以來卽有教門所應禁者新教而老教斷無禁革之理至遣勇練兵本係當時急務惟其中具有條理節目非空談議論所能辦到耳

肅州李牧宗笏稟州屬邊關五方雜處往來游勇溷迹請嚴密巡

緝由

同治甲戌

肅城附近一帶壘出搶案該各防營并不加意巡緝致游勇肆行劫殺殊屬玩泄候飭譚提督等各就駐防汛地分段實力防護如所轄境內再有搶劫情事卽將該營員先行記過并賠償失物勒

限緝獲兇犯見在肅州城鄉逗留游勇多係各軍遣散勇丁該署
牧尤宜嚴查保甲以免溷迹此後駐肅各軍撤遣弁勇應遵照定
章選派委員併起押解歸籍免致流爲游勇至該州一切應辦事
件應卽切實整理俾新復之區日有起色任事無不任怨只要自
己無錯那管背後議論另稟并悉已飭章鎮加撥兵勇赴雙井駐
紮多取柴草送局惟據章鎮稟已加派兵丁百名若必令派撥一
營無論該鎮兵勇不敷分撥且人數太多糧運柴草又恐難供支
應該署牧殆未之思耳

皋蘭馬家灣回民馬天雲等呈稱無地安居懇請仍回原籍由

爾等自同治三年被脅至河州唐王川據稟屢蒙前任督院准仍

批札卷五

三

回原籍當時并不急圖自拔歸來其無鄉土之戀可知河州平定
又已兩年始自稱善門不便與匪人比論懇回皋蘭原籍素習書
禮者恐不如此本爵閣大臣辦理回案定章客回由官指地安插
不准仍回原籍爾等豈竟無聞見公然具呈瀆懇故違定章殊屬
膽妄姑念愚民無知免其深究仰蘭州府於所屬州縣荒絕地畝
另籌安插毋再逞刁自外生成

山西蔣藩司凝學稟候由

來牘敬悉晉中防軍早可裁撤冗軍糜費數年殊可惜耳此間亦
陸續遣撤數千人新定之區勢難頓撤且費亦不繼西師待發而
動言裹糧未裕駐軍哈密者且立意阻其前進坐耗至艱之糧無

若之何不佞衰朽餘生無能爲役每懷靡及時切憂思至復赴酒泉一說暫時自可無庸緣賊竄瑪納斯關外至哈密巴里坤一帶數千里并無賊蹤也西事之難一在糧運艱阻一在任事無人賊尙不足慮耳關內安謐如常只盼歲事豐登餉源不涸尙可支持河州潘牧效蘇稟回民古祥泰等私遷靜甯由

回民古祥泰等遷赴靜甯安插據查復并非由該署牧飭令起遷則該回等私遷屬實茲既由靜甯州安插妥當姑免置議此後該回等如有不稟明地方官任意遷徙及私相招致合居者立予嚴辦該署牧應遵照疊次檄飭嚴禁河回私遷是爲至要如所轄境內有應遷之回務遵定章先行具稟聽候諭知安插地方預爲籌

批札卷五

三

備以免臨時周章

平番縣陳令觀幹稟安插回民與漢民處處爲鄰究應如何辦理請示由

此起遷回原令安插海石灣地方該令於上年九月間奉飭後旋以海石灣及平番屬境無可安插具稟請撥他縣意圖推諉當經批飭仍擇所屬荒絕地畝妥爲辦理嗣於十月間據碾伯縣童令稟米拉遷回因平番未撥安插地方殊難起遷等情復經本爵閣部堂行文嚴飭迅撥妥地安插乃數月之久該令并不遵飭擇就妥當地方移催起遷玩泄可知至松山平城兩處本非該遷回舊居之所荒絕地畝又多安插此起回民既屬相宜該令自不應遽

准漢民所控另撥安插既准另撥自應仍遵定章踴擇安地又何必定擇該回原住之大小川地方安插致令漢民有所藉口將來滋生事端誰執其咎見在播種及時仰立遵前批迅於縣屬另撥荒絕地畝妥爲安插具報并將安插地方繪具圖說呈覽

陝安三道壽稟白河會匪滋事情形由

白河匪首雖據報捕斬然風謠遠播人數頗多漏網者自必不少與其由官查辦不若實行族團鄉團令其族長鄉長自行查緝免致兵役下鄉先添一番擾索也興漢兩郡山谷深邃最易藏奸而地連川楚游匪出沒不常尤宜時加檢察不可以目前無事稍涉鬆懈州縣最須得人樸勤者爲上安靜者爲中其濡染近時習氣者不可留也至要至要高一志爲高陵老教島族行教陝甘者多由其指喉筮魯阿其一也前批祇及筮魯阿於高一志未之及此次飭城固向筮說知或高一志又來饒舌亦未可定且看筮魯阿如何說

批札卷五

五

李鎮正魯稟自岔口驛至鎮羌驛路途寫遠難免游匪隱匿擾害良善由

沿途游匪伏匿爲害疊飭各防營嚴密巡緝以靖地方失事之處防營何能辭咎鎮羌驛打柴溝地方爲南字左營分防轄境游匪白晝持刀劫殺行人斃命該防營平日疏忽查拏不力可知且近營之地難保無窩藏游匪情事應勒限廖營官會同平番縣火速

拏要犯李姓等到案錄供詳辦逾限不獲定將廖營官撤參涼州古浪油房臺一帶係仁定各營分防候嚴飭王提督仁和轉飭周提督家盛鄒鎮耀堂督率弁勇會同地方官一體緝拏務期有犯必獲此後分防地段如有游匪犯案在何處失事卽惟該營官統帶是問決不稍寬內地久已肅清到處防營密布尙任游匪橫行不嚴行搜捕試問該營官統帶所司何事能無自愧卽卽懍遵照辦至黃增榮供稱被害之易春堂同在甘州沙井堡廖委員分卡釐局當勇奉差送銀三百八十兩赴省交支應處楊委員查支應處與外營局銀錢交涉向不准私相授受此項銀兩如係公款解交支應處者廖委員自必備具公文請本大臣爵閣部堂核示如

批札卷五

无

係廖委員私款何得徑送支應處何得擅派局勇此中有無別情候行甘涼黃道嚴飭廖委員明白稟復并查看廖委員是否有荒謬行爲轉詳候奪支應處楊委員有無與該局交涉私事候一併查察核辦并飭

狄道州喻牧光容稟回民馬榮所築圍牆情形由

回民私築堡寨本應申禁惟既據稱馬榮所住原莊已撥歸業主該回民因無破舊牆院可以修葺故另築圍牆該署牧見往查勘所築并不高厚與堡寨有別姑准如稟照見式修築完工查馬榮本該州富回從前築立堅堡與城并峙後經傳提督拆毀其不准仍歸原業不但定章不可違且亦勢所不可至其見築圍牆是否

卽該署牧指撥兌換洮西地畝抑係葑臺地方稟中并未明白聲敘無從懸揣仰卽詳細稟復漢人藉詞謂其意存叵測妄思傾陷殊屬可惡斷不可令其得逞切切

陝安三道壽稟遵札提訊陝安魏鎮稟揭周國瑞等一案由

所擬懲辦守備柯清麒千總周國瑞把總陰炳喜營書王謨及令該守備與遊擊徐昌壽賠補所扣兵餉所有支應哨差名色永遠革除不准再行濫應各情尙屬妥協均准照辦徐昌壽自應與該千把一併撤任并記大過一次仰卽移行分別辦理惟查魏鎮前稟與該道訊明各節諸多不符周國瑞陰炳喜出示實係免操一次該鎮則謂其一體停操實係回明徐遊擊准其出示該鎮則謂

批札卷五

三

其并不稟明該管營上并稱徐遊擊曾面加申飭請該鎮懲辦實係因支差短餉恐兵丁滋事起見告示明言免操緣由人所共知該鎮則稱徧問哨弁隊目僉稱不知何故其移送該道甘結內并未敘及支差扣餉與所出示不符是勒具甘結屬實既稱王謨已拏交文員監禁復稱王謨早已潛逃見在查緝亦屬兩歧且先期既札飭不准支應一切及行至白土營該遊擊等支應各項用錢至一百六十餘串之多該鎮豈得諉爲不知其免操告示又明言支差短餉該鎮如果實心整頓何不卽時禁止供應查明勒令發足兵餉不准停操豈有已受供應又將供應一節瞞不聲明只責該千把等不應出示之理其尤甚者該千把營書并無極惡大

罪卽該鎮所稱周國瑞陰炳喜劣迹不悛王謨刁劣已極罪惡貫盈致闔營被害文武受累等語亦并無實在確據乃竟以影響之詞陷人以發遣正法重罪種種謬戾迴出情理之外總兵係武職大員如能正己率屬事無大小一以公允出之方期舉措咸宜軍情翕服若似此居心巧詐自對亦復何顏該鎮平日官聲平常本爵閣大臣部堂早有所聞茲復以迴護哨差支應妄擬科人重罪種種乖謬尤出意料之外候卽據實奏參以肅軍制

中衛縣邵令杜稟點驗石空等堡防兵家屬請撥地耕墾由

緣營征防家屬丁壯應飭撥地耕墾樂土安業其實在孤貧女口由官照章收養給賑原屬正辦前批甚明征兵存亡未卜家屬支

批札卷五

三

領口糧已歷多年萬無永遠坐食之理如需收養則養濟院口糧原准通融辦理其兄弟子嗣年力精壯應令及時勤耕苦作免成無業游手誤其終身卽征兵異時歸來亦有所依恃如慮耕墾無地則該縣荒絕地畝可資指撥如慮牛種無出則照撫卹章程酌量借給亦尙可行該署令惟知苟顧目前不曉事體庸陋之見不值一晒仰仍恪遵前札妥辦分別詳報仍錄批移協營知照此飭陝西譚藩司鍾麟稟商調撥營頭由

頃接李爵相鈔摺咨會調銘軍換防徐州此著早在意中前接總署函詢臺事卽以閩中海防無虞惟賊旣三道深入番境閩兵沿海者及粵浙蘇一帶陸兵均宜戒嚴不可輕調李爵相旣擬以徐

州駐兵援閩應一并將津沽防軍濟之而調駐陝銘軍填津沽之防於事勢似較便利茲調銘軍填防徐州大略相同於臺事當有濟也沈星使言倭奴入番境者聞約一萬五千人則我應敵之兵非萬餘不可蓋臺地扁而長防勦兼籌兵少不敷分布非穩著也銘軍赴調乾邠長不可驟虛穆軍在涇者十營自可就近移撥分駐當咨商穆將軍辦理出關無期正可先其所急如穆軍不能分撥則暫畱成信數營亦無不可徐萬福僅一營太單不敷分防也至此間撤遣之營屬陝甘者全營均散其各客軍則改營爲旂者多若雜湊赴防斷難爲力耳

肅州李牧宗笏稟肅州新復民勇雜處懇請巡緝安撫由

批札卷五

三

肅州一帶游勇日多由於地方官不實行保甲各防營巡緝疏懈所致據稟各情候嚴飭譚提督及肅州章鎮各飭所部按日輪派弁勇各於分防地段嚴拏匪犯交地方官訊辦不准稍有懈怠致干參撤營中不准收畱無來歷之人如外來弁丁犯案審係何營容畱卽就近稟知該道及呈明該統領將容畱犯事弁丁一併送案審訊該統領不准代爲徇庇一面徑稟本爵閣部堂核示遵行該州遇命盜各案有與營中交涉之件自應呈明該統領移會各營官交人赴案候訊統領營官自應依照來文迅速送案聽該地方官辦理若如來稟各將領時有鬪堂鬧罵情形則恃勢橫行罔顧體制各有攸歸本爵閣部堂不能姑容也

李提督輝武稟請加餉添兵由

乾邠長銘軍遺防已咨請穆將軍派撥填紮李提督律武軍并未
檄調該鎮既抵西安應有所聞川中咨調律武軍助剿李提督籌
撥情形已批復在案矣漢中地分秦蜀之中形勢最要近年寇警
四逼制兵不能制乃調勇營防剿至今未能撤也勇未能撤而急
議添兵則餉事又無從籌措且加餉挑兵談何容易非先將將弁
逐加挑選則新兵必不能一律精實遇事仍須調撥勇營是糜餉
可慮貽誤尤可慮也該鎮甫履新任自應將地方形勢所屬人材
悉心察驗趁防營未撤時極意講求爲從新整頓張本庶幾將來
增一營兵撤一營勇屹然仍成雄鎮否則兵額漸增勇營難減不
徒無益李提督在防已久閱歷已深該鎮正宜就近諮訪虛衷商
榷勿徒逞一時意氣而忽遠謀

批札卷五

三

劉京卿稟黃令各情由

來牘祇悉大通黃令前稟各情意有影射蓋因與營員不睦慮其
稟計爲此先發制人之計若謂其意在大樹故效此蜉之撼則未
必然來牘稱收撫之始所委員弁分途往辦未必皆廉潔自好此
亦實情用人既多一時難於區別且當時重在用才有才之人必
責其有守每難求全本爵大臣閣部堂早有閱歷故用人之際未
嘗挾尺寸之見以相繩也方撫回時回急於求生所委員弁遇有
饋獻順便取攜亦事之所有惟所辦之事始終并無貽誤則薄物

細故自可不必深求至撫定之後稍涉誅求則三尺具在無論營員地方難從曲貸矣貴京卿從前與黃令每多原恕之詞今於撤任之後始悟其詐耳張令已報到任前事姑勿深究所部各營員應時加申做爲要

狄道州喻牧光容稟籌款興修學宮由

各省府廳州縣均立學故各建學宮凡興建修復均各府廳州縣官紳士庶自爲之其制不能意爲增損其費不能取資異地此天下通義也據稟就各防營勸捐於義無當姑以該州兵燹之餘無從集費勉允所請惟一切規模均須渾樸而合體制不可效世俗務鉅麗以壯觀瞻致與尋常廟宇等也如經費不敷准於該州地價項下酌量動用惟必須具稟請示乃可稟中請頒公費未知所指何項學宮無請頒公費之理也

批札卷五

五

周提督紹濂請借領大餉籌議楚湘各軍建醮由

楚軍由東南而西北縱橫埽盪攘除奸兇將士從征捐軀殞命者何可勝紀除戰績最著死事最烈者均經奏請於立功地方及原籍建立專祠此外昭忠忠義祠崇報祠或本軍捐建或地方士民捐建者亦不知凡幾卽中元孟蘭大會自咸豐十一年至今本爵大臣閣部堂無論在營在署屆時躬臨奠醮備祭品延僧道招魂灑淚以安塞悲凡屬同袍皆所目擊吾湘士紳於長沙釀金建立道場因招魂之舊俗明敵愾之同心具見桑梓攸關公私兼盡惟

事已舉行數年自己籌有鉅款前此楚湘各軍林立集費非難如果必須仗助自己早爲議及何待今茲若見在關隴諸軍正籌撤遣存者既不盡是楚軍且積欠之餉已至一年有餘將士遠道從戎迥異東南各役本爵大臣閣部堂多方調度挪在營老餉先給撤遣諸營嚴核截曠實數以資支發俾假歸將士各得本分實餉分文不欠聊示信義更何有餘資捐寄本籍助建道場據稟該提督擬飭所部四旂各捐一百金自捐二百金以襄斯事惟支絀異常請借發給領於將來大餉劃扣該提督廉樸好義本所素知所擬迥異亟於營私及藉公肥己者殊深嘉尙惟建祠建醮本軍久已舉行無須另爲籌議本籍士紳爲楚湘各軍建醮因而附及本

批札卷五

三

軍將士固屬可感若因醮金不允遂置之不理在我尙無遺憾不准因捐費無措請領大餉也至甯鄉捐建關廟該提督已交捐銀九百餘兩不爲不多尤不得因找捐請領大餉本爵大臣閣部堂自忝預戎事以來從無派捐各統領營官之事斷不能自破其例仰錄此稟批覆勸捐者

陝西軍需局詳報湘果軍各營卹賞及墊發各款准駁一案由本爵大臣閣部堂調督陝甘其時劉前撫院已交卸撫篆旋即回籍其任內兵事餉事從未預聞并無函牘文涉事歷八載官經數任劉前撫院又已在籍溘逝撫署司局尙有案卷可查本衙門則并無一字在檔卽追檢楊前部堂及穆署部堂各任內亦無一字

也何能代前撫院及接任各撫院料理舊案至蕭故鎮慶高一案其薪糧卹賞有應由川給領者有應由陝給領者劉前撫院任內既有案可查應由司局分別議詳請撫部院核奪薪糧應由川給者咨川辦理由陝給者應否照章分成分年完案卹賞由陝給者應查當時有無冊報其陣亡弁勇如當時未經冊報或查從前招募花名清冊及事後撤遣存勇冊報磨對其實應由陝發給卹賞者如人數過多應否分成減給完結其無從確悉者雖有親屬呈領無憑發給亦不能因蕭故鎮親屬赴陝呼籲籠統發給其蕭故鎮墊發各款縱令屬實如未經報明准銷亦可批駁也此案早應辦結而該局延今未結雖謂庫款支絀使然卻亦由畏難苟安所致

批札卷五

五

致究竟零星點綴亦不能不費開銷而懸宕不了徒以一俟庫款充裕統籌核辦等語抵塞畱一話柄卽多一番曲折殊所不取仰卽傳蕭副將慶貴等到局逐款查對實應由陝給領若干無論何項一并牽勻計算准酌給若干取具結狀存案務期一了百了永絕葛藤詳請撫部院咨復湖南撫部院一面行知湘鄉縣出示開單俾各弁勇家屬一律周知方爲妥協以事勢揣之所費亦復無多如可不咨四川亦無須咨達徒煩文牘

肅州李牧宗笏稟請修嘉峪關邊牆以便稽查稅務由

嘉峪關附近邊牆坍塌甚多內有四處直可行車去冬本大臣會閣部堂於肅州凱旋時親臨閱視比面諭章鎮俟春融督勇修治

并另檄飭遵在案嘉峪雄鎮最爲西路第一要隘當此關隴全境肅清本應及時補修完好各色往來車馬人等一體遵率坦途由關門出入以時啟閉不准分歧越據稟前情候飭章鎮趕趁秋晴刻期派撥兵勇分段興修具報惟工程頗大應先將通車各口杜塞出路庶便稽查一面由該鎮道會銜出示曉諭俾行旅周知爲要候分行知照仍將設卡查稅日期并司卡委員銜名通報查考

李提督輝武稟移紮乾防情形由

來贖具悉邠乾大道防營未可全撤銘軍去後已咨穆將軍就近撥營移防適接陝撫部院函商意見相同而穆將軍於未接本大

批札卷五

三

臣爵閣部堂咨文之先已撥營分駐是邠乾已有填防營頭矣前接汪牧稟報未悉該軍派紮乾州原委查各軍所部合紮一處彼此難於浹洽易生事端乾邠長旣有穆將軍撥營填防則該軍自無庸分紮已准陝撫部院函稱仍須撤回原防想此次進省面商必已定計希卽將辦理情形具報此開本年撤遣各軍營員弁勇丁數至二萬餘名均照名散餉發給路票安靜行走并無向來惡習想貴軍門必有所聞至游勇則關內外各軍人數甚多難保無匪徒混雜已飭沿途各防營加意巡察嚴緝仍須飭所部各營馬步勤查嚴緝勿令漏逸爲害

沈鎮玉遂稟出隊剿捕河州叛匪由

河州回匪未加痛剿此次之變響應者多該鎮視賊太輕宜有此挫十四夜賊撲甯河官營意圖偷襲營盤經黃鎮添泰殺追斃賊頗多已據張統領函報次日張凌自必帶隊赴甯河但未能剋期赴約耳見已調各路進兵如能同時并舉則賊事可速否則又成蔓延之勢也葑臺堡一路空虛見飭蕭提督帶兩旂全隊并調渭源三營五成隊併赴此路斷其勾結尙未知趕得上否

張鎮福齊稟自率營務營渡河駐防汪百戶由

該鎮調後勁旂周副將六成隊伍沿康家巖而下先鋒旂袁鎮六成隊伍從古城至八峽寺力扼洮河晝夜梭巡調祝副將三哨駐沙泥中堡以保大道自率營務營六成隊及右副營王副將兩哨

批札卷五

三

渡河赴汪百戶防堵截該逆入東鄉之路布置均妥既據沈鎮函告張提督仲春見在馬占鼇馬永瑞各於東西鄉挑壯丁共六千人分三路剿賊請沈鎮知會各營固守城垣不必出隊等情自可俯如所請各營暫宜按兵以俟嚴扼匪徒四竄之路且看馬占鼇等辦理情形若何再定進止候飛飭宗岳軍張提督良輔平西等營凌鎮左路粟鎮隨時馳報葑臺一路蕭提督已否派兩旂扼防如兵力不敷必須宗岳仁信誠各營分隊協防應由張提督與蕭提督妥商辦理不可稍涉大意唐王川有尤鎮馬隊駐防阿干有義勝營駐防義勝營之分駐金家巖者已飭調赴西柳溝扼防仍仰該鎮隨時函商辦理以臻周妥

河州潘牧效蘇稟閔逆直犯西南兩關燒燬房屋由

馬占鼇等門戶丁本不足恃早在意中故該牧前稟請止調西甯之兵未允所請茲復稟催請調宗岳平西左路營務等營速整隊前來與本爵閣大臣部堂飭各軍暫時按兵勿動之意相反本日已分行各軍矣河州城固可守以言兵力戰不足而守有餘軍糧子藥儘敷數月之用賊無多馬又子槍縱有不多且亦非攻城之具該文武等有地方之責今僅責其守城且係完備可守數月之城并非難事姑念庸闇之才不足與言方略且責其固守月餘以待援師之至儻有差錯自問應得何罪賊情狡變得計在一速字官軍失機亦在一速字來稟所稱官軍早到一日地方早安一日然則十五十八之失豈是遲耶各處不安河州能獨安耶事前疏於防察臨事一味張皇可乎哉

沈鎮玉遂稟賊擾關廂縱火燒搶由

昨據該鎮十九日午刻函報十八夜該匪率眾千餘闖入西南兩關縱火燒搶見屯聚城西北拱拜情形已經分飭各軍歸西甯劉道總統會同進剿并另檄該鎮督同潘牧嚴密防守城池毋稍疏忽致干參辦各在案茲據稟報十九日申刻該匪由西竄去一股該鎮已飭循化起臺堡四營旂迎頭攔擊該各營旂自必扼要整隊相機堵剿毋令闖入撒地循化起臺堡附近一帶卡家寺各番族向來打仗得力應由該鎮及安丞福迅派該各番目調團協堵

其大何家積石關一帶該匪是否竄去由彼渡河番族甚多應由律勇營李提督運勝李遊擊賓光及喬倬金鏞迅派該各番莊出隊協堵由積石關沿河而上爲下四工撒拉素尙安穩信服馬都司占鼇應由該鎮飭令馬都司傳諭各工回目設法扼要嚴防并杜句結其大何家渡河迤北西馬營等處已飭總統劉道迅統大隊由此赴河并派安西靖西各營擇要駐紮以遏紛竄而護運道該鎮仍應督同潘牧堅守城池已據潘牧來稟批示矣
粟鎮龍山稟會商各軍駐防情形由

據稟宗岳軍張提督已調仁信誠三營於十九日均至太子寺二十日即可會同凌鎮前進該鎮并派左旂隨同前往甯河堵剿查

批札卷五

早

太子寺至甯河六十里二十日各營由太子寺進只能駐甯河是日卯刻已飛檄張提督凌鎮暫宜按兵以俟嚴扼匪徒四竄之路且看馬占鼇等辦理情形若何再定進止各軍奉檄後自必不敢輕動本日因閱逆於十八夜竄犯州城西南關燒搶民房仍屯聚城西北拱拜地方復經飛檄宗岳軍張提督良輔營凌鎮營務營張鎮及該鎮等嚴防甯河太子寺三甲集汪百戶洮河上下各要隘堵截竄匪按兵勿動俟大軍雲集聽候總統劉道節制調遣各在案據稱張提督凌鎮等二十日會同前進是否卽進甯河扼紮張提督凌鎮等仍應懍遵疊次檄飭按兵甯河一帶嚴密防堵聽候劉總統調撥毋得稍涉輕率致滋貽誤至宗岳良輔平西各營

進扼甯河該鎮四營旂應多派隊伍嚴守太子寺三甲集等處其康家巖站灘柳林溝一帶已檄前路劉提督派左旂陳提督光明右營黃總兵承佐各率六成隊伍馳赴該處與前路後旂李參將勝才聯絡協防力扼洮河以東上下惟據該鎮稟稱東鄉亦有蠢動消息此路可通馬啣山黃石坪一帶應飭劉提督另派隊伍填防車道嶺一帶上緊探防毋稍疏忽康家巖及洮河上下一帶如有疏失卽惟營務營前路各統領營官是問太子寺三甲集等處防堵唐王川義勝左營徐鎮防堵阿干鎮均應上緊扼防晝夜梭巡不准稍涉大意仍仰將遵辦各情形隨時飛稟是爲至要

批札卷五

望

張提督仲春稟會商各軍整隊合剿并籌備防地由

據稟本月二十日會同凌鎮由太子寺率馬步十一營旂出隊甯河是否卽由甯河前進殊深懸系此時總以扼要駐紮防賊紛竄爲是今早已將調度情形詳悉行知矣如果葑臺堡大東鄉兩處實可放心局勢穩固該兩軍旣由甯河前進卽會紮河州三十里鋪相機剿辦亦可惟甯河居大東鄉葑臺堡之中又爲諸軍運道此處畱防隊伍必厚而可恃乃無後顧之虞據稱馬彘十投誠較早素來尙好見檄蕭提督得龍率兩旂駐防喻牧亦辦團協堵是否周妥俟喻牧蕭提督稟到始知端的然不可大意也來稟請以左路左後兩旂移駐該處查該兩旂見檄令駐太子寺三甲集等

處地居緊要與甯河等左路四營旂分隊協防猶嫌其單何能再撥他處該部義營暫宜緩進本日已檄粟鎮多派隊伍嚴扼三甲集太子寺一帶而以前路左右後三旂協防康家巖洮東沿河上下與營務各營會同妥辦矣

劉提督端冕稟布置後路防務由

據稟布置後路防務各情均悉李參將兼顧左路前旂防地前已有檄飭知嗣因宗岳良輔平西兩軍前進甯河左路粟鎮各營旂協防太子寺三甲集復於廿一日辰刻檄該提督調前路左右兩旂各派六成隊赴柳林溝站灘康家巖會同前旂扼防洮東騰去粟鎮四營旂多派隊伍嚴守太子寺三甲集來稟係二十日發申

批札卷五

聖

故前檄尙未奉到仰卽速遵辦據稱黃鎮已派右營一哨填金家巖義勝營原防是右營之分派康家巖站灘一帶隊伍仍屬無多此時河冰合凍洮東防務甚關緊要且宗岳良輔平西兩軍已於二十一日由甯河前進張鎮所部營務營及副左兩哨之扼汪百戶者亦於二十日到河州張鎮扼守洮河以東隊伍僅先鋒後勁兩旂及副右三哨兵力較單應飭該提督遵照二十一日辰刻檄飭嚴令左右後三營旂力扼洮河上游并與營務各營旂畱防隊伍聯絡一氣如兵力不敷則恪營馬隊金縣二起馬隊均可由該提督酌量調派前赴洮東一帶梭防不得稍涉大意

劉京卿稟親率各營進駐大何家由

據稟親督馬步九營旂八成隊伍於二十四日起行二十七日前隊可抵大何家具見赴機迅速西甯城防由何鎮鄧守布置該道并畱一營助防且蜀軍四營亦調由甘州碾伯速到當臻周妥此間續據探報宗岳良輔兩軍二十三日在河州三十里鋪麻木溝擊賊大挫當於二十四日飛知該道在案此次凌張兩軍之挫仍係視賊太輕隊伍不整遇伏所致查三十里鋪接連買家集馬蓮灘韓家集路路可通山徑又極險仄該逆慣於溝嶺要隘負隅伺擊賊數雖不過二千而路徑紛雜防勦均難該軍行抵大何家後察探賊蹤所在穩慎圖之如由劉家集直擣賊巢或賊又由買家集韓家集繞越後路亦不可不慮也揣度賊情似係句誘大東鄉

批札卷五

聖

及葑臺堡各回爲增眾之計此間先布置洮東之防防合凍後賊蹤東竄一面飭宗岳軍張提督良輔平西營凌鎮整理隊伍扼紮甯河左路粟鎮定西軍蕭提督力扼甯河三甲集太子寺葑臺堡一帶防賊南竄以上各軍均嚴飭穩紮勿動俟該道前來察看情形妥爲辦理見在賊蹤又趨買家集似因摸泥溝等處未能逞志由西北折而東南該道抵大何家後賊蹤又不知何向須到河州後偵探明白與各軍會商謀定後戰乃策全功軍情瞬息千變本大臣爵閣部堂不爲遙制也該軍需用糧草除已飭徐鎮就阿干鎮備辦白麪十萬斤預備追賊東鄉行隊之用若論寬裕易辦仍須取之河州已飭沈鎮督同潘牧備辦供支事竣另行報銷見調

毅軍宋軍門涼州營來省聽候派撥尙須旬餘始到一併告知
劉提督端冕稟率所部馳赴康家巖并派營接防由

該提督已於二十六日午刻親督馬步各隊馳赴康家巖計二十
七日可以到防殊深懸系此時該提督馬步分駐康巖柳林溝站
灘一帶者共八營旂行隊人數約近二千康巖至沙泥六十里洮
水合凍到處可通仰派馬隊沿洮晝夜梭防與營務四營旂聯絡
一氣力顧東岸則黃石坪馬啣山均在屏蔽之內康巖西至三甲
集二十里距粟鎮防營不遠仰并與該鎮力籌兼顧以臻周妥安
定囒口車道嶺一路已檄中路李提督酌帶隊伍兩營分防以護
運道而資策應李提督自必照辦渭源有開字營駐紮并民團協
防此時尙稱安謐據稱該逆受創後恐圖南竄恪營宜兼顧渭源
籌慮固屬周密然渭源居狄道之後只要狄道葑臺之兵防堵嚴
密甯河三甲集太子寺防營均無疏虞即可控扼南路仰隨時多
派偵探并知會各防營毋稍大意爲要

狄道州喻牧光容稟城防喫緊募勇一旂請發薪糧由

葑臺一路關重前已檄蕭提督派兩旂嚴防嗣據該提督來稟自
帶副中正右兩旂六成隊伍督同李倬支瑞率馬致高團丁六百
餘人分防葑臺西北山觜高家集之虎牢關及狄道交界之松明
巖一帶經本大臣爵閣部堂批示聯絡甯河太子寺各防營彼此
兼顧以期穩固本日并據該提督稟批令將見駐狄南百二十里

之峽城副左旂遊擊李乾一旂迅調回狄策應以厚兵力蕭提督自必照辦此外除陳副將厚順振威右旂梭防河橋外其狄城防務亦據蕭提督稟派嚴倅先禮五成隊協同副中正右二成畱防隊伍并該牧所練團勇六百餘人布紮城上以重城防茲據該牧稱城垣寬闊防守難周擬添募防勇一旂仿照定西各旂章程給發口糧編成隊伍協防暫准照辦城牆城門破爛之處應趕緊修整經費准其開報李倅既在葑臺率馬致高等辦團何以又回狄城大約因未曾奉札之故候加札該倅飭遵見商調宋軍門毅軍大隊前來取道該州前進仰卽廣破軍糧以資接濟勿許遲誤張提督仲春等稟在甯河擊賊情形由

批札卷五

望

據稟二十五六七等日防守甯河城情形均悉甯河地方爲河狄咽喉關係極重仍仰該提督等嚴密布置竭力守禦見在賊勢趨向未定詭計又多或分股以示弱或佯去而忽來切不可墮其奸謀是爲至要數日之內卽有大軍會剿只欲堅守甯河便易下手守城傷亡弁勇仰查明稟候給與卹養仁義誠三營幫辦既尙得力仰張提督飭令趕緊整隊以備戰守已回太子寺之三營如何整理仰一併稟復候奪需用軍火已檄前路劉提督左路粟鎮設法護解矣

署哈密協魏副將忠義稟哈密情形由

哈密地居天山南北兩路之中形勢最要聞纏回見存不過十之

一二屯務亟宜舉行見咨商張軍門妥爲籌辦不但爲軍食計亦所以爲哈民計也該副將遇事宜稟商張軍門實心經理方爲不負委任前敵情形已接額副都統函牘得悉一切由哈密西南路赴吐魯番托克遜阿克蘇一帶路程及沿途水草情形應確切查詢明白繪圖稟知帕夏擬送伯錫爾福晉歸哈密見有無確信吐魯番纏回素稱良懦此次爲帕夏所制不能自由亦殊可憐也該副將在邊有年風土人情自己熟悉應將確實情形詳細稟知聽候批示毋得照綠營惡習摭拾浮詞具稟凡有稟牘儘可據實直陳如寫家信不必裝點隱飾切切

尤鎮成章稟洮防喫緊情形由

批札卷五

異

沙泥上下要隘原責成營務營張鎮會同該鎮駐唐王川之東岸馬隊妥爲布置扼賊東竄何以張鎮全隊盡赴康巖畱防營盤者僅十餘人洪崑灣八峽寺冰橋已結之處瞭望者僅一二人值此洮防喫重卽謂康巖三甲集一路應協派隊伍何至空壁而出置自己防地不顧如此草率糊塗殊不可解儻賊蹤由沙泥上下偷渡洮東張鎮自問應得何罪應嚴飭張鎮卽速撥六成隊伍與所部各營旂回顧原防不得稍涉疏忽該鎮亦應遇事妥商張鎮聯絡把守防務有疏亦不得專諉過於張鎮所需食糧仰函商阿干鎮徐鎮籌撥可也

劉京卿等稟會合沈鎮進攻各情由

據稟該道於初二日會合沈鎮率隊先紮二十里鋪步步滾營前進籌畫均妥本日據宗岳軍張提督等初一日甯河之捷斃賊頗多稍爲慰意計賊必回竄老巢併力拒敵或紛竄大東鄉暫延喘息惟張鎮福齊違令將扼守洮東各營旂拔赴康家巖據稟初三日又同劉提督粟鎮等出太子寺一帶擬與該道爲夾擊之計本大臣爵閣部堂急飭親兵四哨前赴沙泥一帶填紮各壘計初三夜始可趕到也賊經屢創自是散局當極力搜捕以淨根株其逆目閔殿臣父子及各死黨斷不准漏網庶可永遠安靜勉之望之狄道州喻牧光容稟蕭提督調隊布置情形由

閔逆股匪人數本屬無多因河州文武開辦謬率誤墮奸計以致

批札卷五

聖

兇燄漸張附和日眾幸甯河官軍於挫後擊斃撲城悍賊又初一日擊敗西關踞賊賊膽漸寒劉道沈鎮大隊初一日已紮河州南二十里鋪劉提督張鎮已率四成隊赴太子寺相機會剿局勢已有轉機惟洮東畱防隊伍嫌單本大臣爵閣部堂已發親兵四哨前往助之又商派宋軍門統率所部赴沙泥初六日亦可到防暫將此面布置周妥庶大軍由河州壓剿而前免敗賊由洮西竄出較易收拾該署牧乃以利在急剿爲言何耶

劉京卿等稟連日會剿閔逆情形由

該道初二初三之捷斃賊甚多并陣斬逆子閔福一逆目黑里布等焚燬其巢具徵督隊整暇調度有方覽稟殊深喜慰閔逆經此

痛創後脅從解散死黨本屬無多前據沈鎮報稱閔逆次子已斃於甯河城下封狼獾羆所賸無幾此時竄入東鄉如仍謀嘯聚負隅無難一鼓掃蕩洮東迤南如沙泥康巖沿河上下均已加派防營趕往扼堵葑臺防務亦嚴責蕭提督得龍安辦力杜句結馬哈十聞閔逆已敗當不至仍存異心閔逆如向北塔寺一路改裝潛逃沈鎮見派右營隊伍攔截嚴密梭巡亦難漏網所有著名首要各犯及甘心從逆之游匪無論漢回罪在不赦仰卽督同各軍嚴密搜捕完此劫數上年河州就撫未及痛予勦殺遂畱餘孽此次惟實係被脅附和者准稍寬一綫外其餘抗拒官軍兇惡各匪孽由自作天理難容斷難姑息想該道亦見及此矣所有尤爲出力

批札卷五

吳

將弁兵勇准該道開摺請獎陣亡之何提督明海等四員弁力戰捐軀深堪憫惜候奏請從優

賜卹其餘傷亡勇丁准查明稟候給予卹養

張鎮福齊稟前往甯河將勦辦情形稟商總統由

前據尤鎮稟稱該鎮率全隊赴康巖洮東防務空虛比經嚴飭該鎮迅派六成隊伍回駐原防并加撥大營親兵四哨前往協防以昭慎密茲據該鎮稟復已畱四營旂六成隊伍在營嚴飭各幫辦將汛地照常密守自帶赴康巖者仍只四成隊伍與尤鎮所稟各異見據大營親兵各哨官稟報初三日二鼓行抵沙泥已飭令查明實在畱防隊伍具報該鎮與尤鎮固無所庸其分辨仰該鎮卽

將畱防該各營旂營官幫辦銜名具報以備查核而專責成儻有疏失軍法具在如該鎮已多提隊伍向前而畱防人數太單致該各幫辦得以藉口該鎮斷不能當此重咎尤鎮馬隊應卽聯絡營務各營旂步隊加緊嚴防洮東上下不准藉口兵力單薄致滋推諉見并咨商毅軍統領宗軍門親率所部四營前赴沙泥一帶助防已於初五日啟行矣

粟鎮龍山稟親率中營駐防八峽口由

甯河官軍擊賊獲勝情形昨日已據凌鎮張提督稟報該鎮分派隊伍同劉提督張鎮赴太子寺前進自督中營防三甲集以顧後路所辦尙是賊經甯河痛創後分赴東鄉糾眾助逆亦意中事洮

批札卷五

兪

東防守最關緊要前檄飭該各軍前進太子寺約定湘軍爲夾擊之計只准抽帶四成隊伍者原以洮東之防斷不宜鬆耳本日據營務營張鎮稟稱只帶該四營旂四成隊伍前去仍畱六成隊伍飭該各幫辦帶領扼守又據前路劉提督報稱只帶副中左二起恪營馬步四成隊伍前去計畱防各隘者尙有右營後旂頭起正中馬步四營旂其各營旂之已經前去者另有畱守之隊如果屬實兵力尙不爲單其劉提督所畱分防各地段責成何營營官幫辦已飭一併查明銜名申報查考毋得銳前疏後致畱罅隙任賊紛竄致干大戾三甲集至太子寺中間之祁家集間有零匪搶劫劉提督張鎮等帶隊由此前進自必逐加搜洗仰該鎮上緊梭巡

毋稍疏忽殺軍四營本日由省城開赴約初六日可抵沙泥合併
飭知

狄道州喻牧光容稟募勇破糧情形由

據稟已悉所募之勇已成一旂准其畱待明春再候酌奪團勇二百名緩至年底撤退亦無不可閔逆復叛自取滅亡不但非官軍所及料卽詢之該逆當亦不解其何故非天奪其魄而何回性多疑善詐地方官總宜示以誠信不欺隨時指示俾其覺悟庶免爲刑戮之民若徒在智取術馭上用心終非父母斯民之謂也毅軍已於初六日齊抵沙泥如此事速藏自可毋庸再進該軍食糧已預備破運足供一月之食該州卽可停破

批札卷五

辛

劉提督端冕等稟在胭脂溝等處擊賊奪獲軍械輜重由

據稟該提督等初六日在下赶坡胭脂溝兩處擊賊陣斬悍賊四百數十名生擒王有才等八十三名奪獲軍械馬匹輜重甚多此戰出賊不意大挫凶鋒良深嘉慰該逆經屢次痛創脅從必散死黨無多正宜乘勢痛勦將首要各犯甘心從逆漢回各賊與各處游匪概予殲夷速了此劫前檄該提督等申明紀律除臨陣外不准濫殺不准姦淫婦女搜搶財物燒燬糧食如敢故犯准隨時軍法示懲蓋不但目前整軍勘亂之計亦所以銷弭異日怨毒隱伏之根也十一年秋閒大東鄉之役王提督衍慶辦理不善本爵大臣立予撤退民情始安此次閔逆藉口報仇訴冤嗾眾搆變而未

嘗怨官兼旬迫脅而附和者不過數千卽其明效辦回與辦各賊不同辦土著之回又與辦外來之回有別不可不知也該提督等見會商劉道約定初七日分路截剿一切機宜仍仰隨時稟商劉道以歸畫一洮東布置已周加派毅軍四營助防兵力甚厚無虞竄逸想已知悉此次尤爲出力之將弁勇丁准存記候獎陣亡之參將陳貴德等候奏請

卹典其餘傷亡弁勇准查明給予卹養銀兩

張鎮福齊稟辦理大東鄉從賊餘逆并搜獲軍械由

該鎮訊明身受重傷之馬五十五等十四犯其與官軍陣前抗拒無疑業經先後斬梟法當其罪此外押解十二名并錄供呈宋軍

批札卷五

五

門行轅應卽歸宋軍門核辦其餘十餘犯自己訊供明確情眞罪當者應卽就軍前處決毋庸轉解情節尙須復審者卽解交本大臣爵閣部堂委員羅牧長祐督同趙縣丞謙就沙泥審訊應正法者呈請宋軍門核奪就地正法或罪可輕減或應畱質訊者卽由羅牧發交沙泥太子寺州判衙門暫行收押分別訊供候奪前已分行在案仰卽遵照妥辦其陳馬二莊回民馬良伏等緝到馬勒者十一犯并隨同周副將等拏獲米三十五趙三十箇米海伏米得及軍械等件緝捕尙屬認真其十八日拒捕在逃之米勒者各要犯仍應勒限馬良伏等密速掩捕到案以清餘孽另候酌給獎賞

陝西裕臬司寬詳嚴訊潘溢中供詞由

潘溢中一犯逗畱西安五年交結游勇久係戈匪頭目陳臬司在山西劉京卿在金積均曾嚴拏未獲茲據河州沈鎮密稟查拏比飭該臬司督縣拏獲訊供姓名籍貫年貌住址與札開無異其爲眞犯無疑據詳屢經府縣提該犯嚴訊僅據供認前在金積堡隨營聚賭聞拏潛逃一事其入會爲匪一節恃無質證終不承招查戈匪以茹刑不吐不叛夥黨爲好漢該犯既不承招其爲戈匪頭目更屬顯然仰卽飭長安縣監提該犯照游勇逗畱聚賭吸食洋煙軍令立斃杖下庶昭炯戒仰卽轉飭遵辦具報

